

Քիրոզբենդ, Չուրաա եւ Ղարադերէ բնակավայրերի միջեւ: Աղ-չայ գետը, նրա կարծիքով, հէնց հին Տղմուտ գետն է¹⁰:

6. Դոկտոր Յարութին Աստուրեանը որպէս Աւարայրի ճակատամարտի վայր է նշում Մակու քաղաքից 6-7 կմ հիւսիս ընկած շրջանը, իսկ Մակու-չայի ձախ վտակ Սարիսու գետն էլ՝ Տղմուտը¹¹:

7. Ակադ. Ս. Տ. Երեմեանը թէեւ համաձայն է Մանանդեանի հետ՝ դէպի ճակատամարտի վայրը Պարսից զօրքի շարժման երթուղու եւ Աւարայրի տեղադրութեան վերաբերեալ¹², սակայն ճակատամարտի տեղը ցոյց է տալիս Ղարաքիլիսա գիւղի շրջանում, այսինքն՝ Մակու քաղաքից 22-23 կմ հարաւ¹³: Այդ շրջանը Ս. Տ. Երեմեանից առաջ Աւարայրի ճակատամարտի վայր էր համարում Կ. Բասմաջեանը¹⁴: Ղարաքիլիսայի շրջանը Աւարայրի ճակատամարտի վայր է համարում նաեւ «Մեծ սովետական հանրագիտարանում» եւ «Սովետական պատմական հանրագիտարանում»¹⁵: Ըստ այդմ, այդ վայրն ընդունում է ինչ-որ իմաստով պաշտօնապէս:

8. Վերջապէս յաւելենք, որ Երեւանի Պատմութեան պետական թանգարանում, հին Հայաստանի ռէլիեֆային քարտէզում Աւարայրի ճակատամարտի վայրը նշուած է Մակու-չայ գետի ստորին հոսանքում, Յուլագելի բնակավայրից արեւելք»¹⁶:

¹⁰ Հարությունյան 1947, 130-133: Բայց չէ՞ որ այս Աղ-չայ գետը հոսում է ոչ թէ **Արտագ**, այլ **Թոռնաւան** եւ **Ճուարշ-ոտ** գաւառների տարածքով:

¹¹ Աստուրեան 1947, 137: Պէտք է նկատի ունենալ, որ այս Սարի-սու – Արուն-գետի հովտի մեծ մասը Այրարատի **Կոզովիտ** գաւառի տարածքում էր:

¹² Հեղինակը նկատի ունի այն, որ Ս. Երեմեանը յղում է Յ. Մանանդեանի «Հին Հայաստանի գլխավոր ճանապարհները...» երկը եւ նրա էջ 155-ի քարտէզը:

¹³ Տե՛ս Еремян 1951, 58, прим. 1. Հմմ. նաեւ էջ 49-ի «Армения и соседние страны в 450-451 гг.» քարտէզը: Ռուսական 5- եւ 10-վերստանոց քարտէզներում Ս. Թադէի վանքի գիւղը՝ **Ղարաքիլիսան**, այլ անուն ունի՝ **Քիլիսա-քենդ**:

¹⁴ Բասմաջեան 1914-1927, 247:

¹⁵ Տե՛ս БСЭ, 1949, т. I, 61 (հմմ. նոյնը նաեւ 3-րդ հրատարակութեան մէջ՝ 1970, 48); СИЭ, 1970, т. I, 61 (բնագիրը գրեթէ նոյնն է БСЭ-ի հետ՝ «**Аварайрская битва 451** – произошла 26 мая на Аварайрском поле (южнее совр. Маку)...», սակայն տրում է նաեւ գրականութեան մէկ յղում՝ «Еремян С. Т., Народно-освободительная война армян..., ВДИ, 1951, № 4»).

¹⁶ Агабекян 1967, 91-92. Այս վերջին վայրին շատ մօտ է տեղադրուած «Աւարայրի դաշտը» նաեւ Բաբկէն Յարութինեանի քարտէզներում (Մակուի եւ Յուլագելիի միջեւ. արդեօ՞ք հիմք ընդունելով մօտակայ «Խանդաւար» գիւղանունի վերջնամասի կամ էլ «**Արաբլար**» դաշտանունի սկզբնամասի զուգորդութիւնը): Տե՛ս Հարությունյան 2004, 49; Հարությունյան 2008, 34: